

Na osnovu člana IV B. 7. a) (IV) Ustava Federacije Bosne i Hercegovine, donosim

## UKAZ

### O PROGLAŠENJU ZAKONA O STANDARDNOJ KLASIFIKACIJI ZANIMANJA

Proglašava se Zakon o standardnoj klasifikaciji zanimanja koji je donio Parlament Federacije BiH na sjednici Predstavničkog doma od 11. februara 2004. godine i na sjednici Doma naroda od 31. marta 2004. godine.

Broj 01-308/04  
14. aprila 2004. godine  
Sarajevo

Predsjednik  
**Niko Lozančić**, s. r.

## ZAKON

### O STANDARDNOJ KLASIFIKACIJI ZANIMANJA

#### Član 1.

Ovim se Zakonom uređuju pojam i svrha standardne klasifikacije zanimanja, definira zanimanje, utvrđuju organi nadležni za njeno donošenje rokovi primjene i subjekti na koje se zanimanja predviđena ovim Zakonom odnose.

#### Član 2.

Standardnu klasifikaciju zanimanja (u daljem tekstu: klasifikacija zanimanja), kao obavezan standard, dužni su primjenjivati svi organi vlasti, privredna društva, ustanove i druga pravna lica u Federaciji Bosne i Hercegovine ( u daljem tekstu: Federacija) koja vrše evidentiranje, zbrajanje, objavljivanje, analiziranje i publikovanje podataka značajnih za praćenje stanja i kretanja na tržištu rada.

#### Član 3.

Klasifikacija zanimanja upotrebljava se na razvrstavanje poslova u zanimanja u upravnim i administrativnim zbirkama podataka (evidencije, registri i dr.) i u statističkim istraživanjima, čime se osiguravaju konzistentni podaci za statističko, analitičko i naučno praćenje strukture zanimanja aktivnog stanovništva, kao i potraživanja za poslom.

#### Član 4.

Zanimanje je statističko-analitička kategorija koja obuhvata skup poslova i radnih zadataka (radnih mjesta) koji su svojim sadržajem i vrstom organizaciono i tehnološki toliko srodni i međusobno povezani da ih obavlja jedan izvršilac koji posjeduje odgovarajuća znanja, sposobnosti i vještine.

#### Član 5.

Klasifikacija zanimanja upotrebljava se kao standard za sve korisnike iz člana 3. ovog Zakona, kada iskazuju podatke o zanimanjima, naročito u području statistike, migracije stanovništva, zapošljavanja, profesionalne orijentacije i obrazovanja.

Međunarodna uporedivost osigurana je pridržavanjem načela i sistema Međunarodne klasifikacije zanimanja ISCO-88 (International Standard Classification of Occupation 1988.) odnosno njegove evropske verzije ISCO-88 (COM).

#### Član 6.

Klasifikacija zanimanja definira zanimanja dajući im mjesto u strukturi klasifikacije zanimanja i šifru za svako zanimanje.

Kriteriji za razvrstavanje zanimanja predstavljaju sljedeće činjenice: vrsta posla, predmet rada, složenost poslova i radnih zadataka, nivo obrazovanja nužan za obavljanje poslova i zadataka, alati, mašine i uređaji koji se upotrebljavaju pri radu, tehnološki nivo poslova i struka.

#### Član 7.

Klasifikacija zanimanja ima hijerarhijsku strukturu. Zanimanja se udružuju, odnosno razdvajaju u grupe zanimanja na četiri nivoa. Grupe zanimanja imaju svoje nazive i šifre. Najviši nivo je rod zanimanja sa jednocifrenom šifrom, slijedi vrsta zanimanja sa dvocifrenom šifrom, podvrsta zanimanja sa trocifrenom šifrom i skupina zanimanja sa četvorocifrenom šifrom a na kraju pojedinačno zanimanje sa šestocifrenom šifrom.

#### Član 8.

Klasifikacija zanimanja zasniva se na načelima i sistemu Međunarodne standardne klasifikacije ISCO-88 čime se svi podaci o zanimanjima predviđeni Zakonom prilagođavaju međunarodnoj komunikaciji.

#### Član 9.

Klasifikaciju zanimanja propisuje Vlada Federacije Bosne i Hercegovine (u daljem tekstu: Vlada Federacije) na prijedlog Federalnog zavoda za statistiku.

Rok za podnošenje prijedloga Federalnog zavoda za statistiku, na osnovu kojeg će Vlada Federacije propisati klasifikaciju zanimanja, jeste 60 dana prije početka primjene klasifikacije zanimanja kao obaveznog standarda sadržanog u članu 10. stav 1. ovog Zakona.

#### Član 10.

Klasifikacija zanimanja kao obavezan standard, u zbirkama podataka iz člana 3. ovog Zakona, primjenjivat će se od 1. 6. 2004. godine, a iskazivanje podataka prema ovom standardu obavezno je od 1. 1. 2005. godine.

U periodu od 1. 6. 2004. godine upotrebljavat će se Jedinstvena standardna klasifikacija zanimanja ("Službeni list RBiH", br. 1/92 i 13/94 i Jedinstvena nomenklatura zanimanja u SFRJ ("Službeni list RBiH", br. 2/92 i 13/94).

Član 11.

Danom stupanja na snagu ovog Zakona prestaje primjena propisa o klasifikaciji zanimanja koji su se do dana stupanja na snagu ovog Zakona primjenjivali na teritoriji Federacije, izuzev propisa iz člana 10. stav 2. ovog Zakona, čija primjena prestaje 31. 5. 004. godine.

Član 12.

Ovaj Zakon će se uskladiti sa odredbama odgovarajućeg zakona kojeg donese Parlamentarna skupština Bosne i Hercegovine u roku koji bude određen tim zakonom.

Član 13.

Ovaj Zakon stupa na snagu narednog dana od dana objavljivanja u "Službenim novinama Federacije BiH".

Predsjedavajući  
Doma naroda  
Parlamenta Federacije BiH  
**Slavko Matić**, s. r.

Predsjedavajući  
Predstavničkog doma  
Parlamenta Federacije BiH  
**Muhamed Ibrahimović**, s. r.